

- Les hannes, dié lo ptét p̄nce, ès s' enfoénant dains les raibeints (*rapides*), mains ès n' saint pus c' qu' ès tieurant. Aidonc ès s' aidgitant èt vaint en-virvô (*tournent en rond*)...

Èt èl aidjouté :

- Ç' n' ât p' lai poinne...

L' pouche que nos aivîns toutchi (*atteint*) ne rsannait p' és pouches saihairîns (*sahariens*). Les pouches saihairîns sont de sîmpyes ptchus creûyies dains l' châbye. Çtu-li rsannait en ïn pouche de vlaidge. Mains è n' y' aivait li piepe ïn vlaidge, èt i craiyôs sondgie.

- Ç' ât étraïndge, qu' i dié â ptét p̄nce, tot ât prât : lai rôlatte (*poulie*), lo sayat (*seau*) èt lai coûdge...

È rié, touché lai coûdge, fsé djûre lai rôlatte. Èt lai rôlatte piaîngé (*gémît*) cment piaînt ènne véye viratte (*girouette*) tiaind qu' l' ôûr é dremi bîn grant.

- T' oûes, dié lo ptét p̄nce, nos révoiyans ci pouche èt è tchainte...

Î ne vlôs p' qu' è fseuche ïn éffôû :

- Léche-me faire, qu' i yi dié, ç' ât trop poijaint po toi.

Bâlment i éy'vé l' sayat djainqu' en lai maîrdgèlle. Î l' ïnchtallé bîn d' aipiomb. Dains mes aroiyes durait l'

tchaint d' lai rôlatte èt, dains l' âve que trembyait encoé, i voiyôs trembyaie lo sraye.

- Î aî soi de çt' âve-li, dié lo ptét p̄nce, bèye-me è boire...

Èt i comprenié ç' qu' èl aivait tieuri !

Î soy'vé l' sayat djainqu' en ses maîrmes (*lèvres*). È boiyé, les eûyes çhouûs. C' était réchâle (*doux*) cment ènne fête. Çt' âve était bîn âtre tchôse qu' ïn aiyiment (*aliment*). Èlle nos était airrivée d' lai mairtche dôs les yeûtchîns, di tchaint d' lai rôlatte, de l' éffôû de mes brais. Tiaind qu' i étôs ptét boubat, lai lumiere de l' aîbre de Nâ, lai dyîndye de lai mâsse de mineût, lai douçou des sôris fsînt dînche tot' lai raimbeyainche (*rayonnement*) di crôma de Nâ qu' ï rciôs.

- Les hannes de tchéz toi, dié lo ptét p̄nce, tiultivant cent mil rôjes dains ïn meinme tieutchi... èt ès n' y' trovant p' c' qu' ès tieurant...

- Ès n' lo trovant pe, qu' i réponjé...

- Èt poétchaint c' qu' ès tieurant poérrait être trovè dains ènne seingne (*seule*) rôje èt ïn pô d' âve...

- Bîn chur, qu' i réponjé.

Èt lo ptét p̄nce aidjouté :

- Mains les eûyes sont aiveuyes. È fât tieuri aivô l' tiûre.

Î aivôs bu. Î réchpirôs bîn. L' châbye, â y'vé di djoué, ât tieûlée de mie. Î étôs hèy'rou âchi de çte tieûlée de mie. Poquoi ât-ce qu' èl airait fayû qu' i euche d' lai poinne...

- È fât que te t'nieuches ton engaidg'ment, me dié tot piaîn lo ptét p̄nce, que, de nové, s' était sietè vâs moi.

- Quél engaidg'ment ?

- Te sais... ènne meûtliere po mon moton... i seus réchponchâbye de çte çhoué !

Î souûché de mai baigatte mes ébâches de graiy'naidge. Lo ptét p̄nce les é vu èt dié en riaind :

- Tes baiobas, ès rsannant ïn pô en dés tchôs...

- Ôh !

Moi qu' i étôs chi fie des baiobas !

- Ton rnaîd... ses aroiyes... èlles eursannant ïn pô en des écoûnes (*cornes*)... èt èlles sont trop grantes !

Èt è rié encoé.

- T'és mādjeûte (*injuste*), petét bonhane, i n' saivôs ran qu' graiyonaie les boas ençoûs èt les boas eûvies.

- Ôh ! çoli adré, qu' è dié, les afaints saint.

Ï graiyoné dâli ènne meûtliere. Èt i aî t'aivu l' tiûre serrè en yi bèyaint :

- T'és des prodjèts qu' i noére (*ignore*)...

Mains è n' me réponjé pe. È m' dié :

- Te sais, mai déguéyade (*chute*) tchu lai Tiere... çoli en sré dmain lai fête...

Èt peus aiprés ènne coidge è dié encoé :

- Ï étôs tchoué tot prés d' ci...

Èt è roudgiché.

Èt de nové, sains compâre poquoi, i aî chenti ïn tchaigrîn churpregnaint. Poétchaint ènne quèchtion me vînt :

- Aidonc ç' n' ât p' poi hésâid que, lo maitîn laivouè i t' aî coéniu, è y' é heût djoués, te te prom' nôs dînche, tot d' pai toi è mil miyes de totes contrèes haibitèes ? Te rvirôs vâs l' point d' tai déguéyade ?

Lo ptét pñnce roudgiché encoé.

Èt i aidjouté, en maîy'naint (*hésitant*) :

- È câse, craibîn, de lai fête ?...

Lo ptét pñnce roudgiché d' nové. È n' réponjait djmais és quèchtions, mains, tiaind qu' an roudgeât, çoli veut dire « âye », n' ât-ce pe ?

- Ah ! qu' i yi dié, i aî pavou...

Mains è me réponjé :

- Te dais mitnaint traivaiyie. Te dais rpaîtchi vâs tai machine. Ï t' aittends ci. Eurvins dmain â soi...

Mains i n' étôs p' raichurie. Ï m' seuvniôs di rnaîd. An richque de pûraie ïn pô ch' an s' ât léchie aipprevéjie...